

2 Pita

Pitayan Zapat Meluwan Mme Zut Beye

Zapat meluwan kapi Pitayan ikñajak kuyeyepmti egalen zapat meluwan zut kapi kuye zenzeyelen ñep wagak. Am manje sekam kwep ekñengat kuye ke am nâmkijpepeñinmak kalañti lalabubuk bemti msat katañ mebep kokotnañ ekñengat kumindaye.

Zapat meluwan yañañ kapigogapmti kuye. Am notnañañ zet pigok zewien. Zisas ku kobe zemti zet notnañ zemyunñungu omba penañ mbien keyepmti kuye. Zet zemyunñuwien keyet dopmañ Kawawañ mutumindawe keyet eyo kuye. Zet notnañ Pitayelen zapat meluwan tazin ke Zudasiyelen zapat meluwan ekbegen egelañ zenâmkukuñañnok tazin (2 Pita 2 ma Zudas 4-18).

Zet ñotekñañ temañ kapigogañ 2 Pita zapat meluwan keñañ talip:

1:1-2 Zet yañbemti zenzeyelen zet

1:3-21 Am Zisasiyañ indakumtetitiñangalen mama mimi kapigok weweyelen

2 An zikat indanda dâsuki ekñengalen zemyunñu yunñunñangalen yañañ

3 Zisasiyañ gilik zemkobeyelen zet

1 ¹Neñ Saimon Pita, Zisas Kilaisiyelen mulup an mamti egalen Zet Zapat Dolakñañ Penañ zemkawañ bembeyelen nâmti nakumtetiye. Neñ zapat meluwan kapi am in Zisas Kilais nâmkijpem maip ingat kumbema kozin. Ek ningalen Kawawañ teñ mamain ma nin yominangat dopmañ titiyelen zapat tapmamann keyengatnañ gilik zemindatiye. Kegok mgeyepm ingalen nâmkijpepe sepem ikñak yek; ningalen nembon sepemit kwep. Ingalenmak ningalen nâmkijpepe ke mobotnañ penañ. ²In Kawawañ ma Amobotnañ Zisas Kilais egetgalen yañit nâmtâtâtâgalen mulupmañ mamip. Ke ma keñ taolet ma keñ sewakñañañ inmak omba penañ wemti weweyelen nâmti mandunduyap.

Kawawañañ ikñangat zapat ombemndeye

³Zisas ek an pembenañ ma winde toñ kegogapm ndakumtetimti winde ikñak ikñak ndame nin mama mimi dolakñañ Kawawañ nâmtikñañ

mam ke mamnup. Winde ikɲak ikɲak Kilaisiyaŋ timti ndamukulem mam ke Kawawaŋgalen winde. Nin Kawawaŋgat yaŋaŋ nâmtâtâtnup beme winde ke ndame nin matinup. ⁴Zetik mobotnaŋ penaŋ mimndaye keyet penaŋaŋ ninmagen kapigok sokbembeyelen nâmti gilik zemndatimti msalen mamti bekanangat keŋ puŋpuŋ mimi ke bamkumpemann Kawawaŋaŋ Zisasmak tusumndeme ikɲangat sek sepem timti mamayet nâŋge.

⁵Kawawaŋaŋ kogok mgeyepm in nâmkɪŋpepemak mamti esemteŋ penaŋ mamayet mulup temaŋ penaŋ mbep. Kegok mti naman Kawawaŋaŋ amnaŋ mama mimi egaŋ nâmtikɲaŋ mamin ke kogogak mbep. ⁶Kogok mti naman keŋin ma sekɲin ekdamuŋ mimi ke kogogak mbep. Kogok mti naman nâmisimti mambep. Kogok mti naman mama mimi dolakɲaŋ Kawawaŋ nâmtikɲaŋ mam ke mbep. ⁷Kogok mti naman notn notn mti mamambep. Kogok mti naman gogot mamambep. ⁸Mama mimi keboŋ keyaŋ inmagen sokbem sambeleleŋgalen nâwep beme Amobotnaŋ Zisas Kilaisiyet yaŋaŋ nânâyet mulupmaŋ mbewen penaŋaŋmak bewe. ⁹An ŋen mamaŋanen kwitnaŋ kwitnaŋ ke ku sokbewe beme egat kapigok zenzeyelen: Ek an zikatnaŋ beŋaŋ, egaŋ zikatnaŋaŋ Kawawaŋaŋ yomaŋ zulutme mebegalen mulupmaŋ mge ke kandat kume ku maekmâtâzin. ¹⁰Keyepmti Kilaismagen notnne, in Kawawaŋaŋ ikɲangat zapat mamayet indakumtetime kokotnaŋ ke penaŋaŋmak bewe e nâmkɪŋpemti in keyet penaŋaŋ mamaŋinaŋ mkawaŋ bewep. Kegok mbep beme yomen ku toindowe. ¹¹Kegok mbanuwen maneti Amobotnaŋ ma An yomengatnan gilik zemndatimkwage Zisas Kilaisi egalen zemâtâtât katnanen mama kwesiŋ kwesiŋ matazin keyet keŋan mepmann ndaoloŋti met ndewe.

¹²In kwitnaŋ kwitnaŋ sambe ke zemzikat indame nâmkaliŋ bematalip ma in nâmtalip keyegak sakwalam zesowap. ¹³⁻¹⁴Neŋ msat sekɲ belaknik kapi gaipema wesâpm ke ilak nâmtalap. Zet ke Amobotnaŋaŋ Zisas Kilaisiyaŋ ikɲaŋ zemkawaŋ bemnaŋge keyepm msat sekmak mambap kataŋ zet ke ewe zemti nânâŋin mamkawaŋ bemambap. ¹⁵In Kawawaŋgalen zet ke kwesiŋ kwesiŋ timamayet neŋ setnaŋ ŋen mulupmaŋ giŋgiŋ mti aikindama timame indikti gulak neŋ yek bewap.

Golaŋ zenze an ekɲenaŋ Zisasiyet zet zenzeŋaŋ sokbeme Pitayaŋ ekmâtâge

¹⁶In Amobotnaŋ Zisas Kilaisiyet windenaŋ ma kokotnangat yaŋaŋ diindowenn ke an ŋenaŋ wekawat mene ma keŋaŋgalak zet kwileki ŋen diindoyeyaŋ nin ku diindowenn. Nin sokɲanik penaŋ tati Amobotnaŋ sekɲaŋ asekti busatnaŋ temaŋaŋmak sokbeme ekbenn. ¹⁷Kawawaŋaŋ Zisas kwizet buŋamaŋ mwati busatnaŋ elimiakpeye. Âpme busatnaŋ keyet keŋanen zet kapigok sokbeye, “Kapi nenangat nemun penaŋ gogot

mampeyap. Neŋ ek ego ego mpema mamain.” ¹⁸Nin nsakwep ekmak kalaŋ kambuk keyet dukŋan moti manepeman zet ke kululugengatan topme nâmbenn. ¹⁹Keyepmti nin golaŋ zenze an ekŋengalen zet nâman penaŋaŋ penaŋ mambein keyaŋ taŋam keboŋ bemti tambusosogen mambusatnaŋ bein kekok nâmatâbep. Kegok mti indamukulem mme ektitimti manepeme Zisasiyaŋ kobe. Sekam saputuŋaŋ msat msambiyet kwati msasa mamandamkozinok Zisas kokotnaŋgalen kanen egalen busatnaŋaŋ keŋin melaŋ belat beme in Zisas ekbep. ²⁰Yaŋgut in ŋeŋaŋ kapigok weyaŋ nâmbep, golaŋ zenze an ekŋenaŋ buŋam zapat Kawawaŋgalen Zet Itnaŋanen meluwaŋ mimiŋaŋ tazin ke ilinaŋgat keŋinaŋgalak nâmti ku zenzeŋaŋ. ²¹Golaŋ zenze an ekŋenaŋ zet zenzeŋaŋ ke an ŋenaŋ buŋam zet ke keŋaŋgalak nâmbiliwati ku zenzeŋaŋ. An ekŋen Emetak Teŋaŋ iŋkaŋ keŋin melaŋ belat bemindeme Kawawaŋmagengatanŋ zet timti zemkawaŋ bemkwabien.

An zikat indanda dâsuki ekŋengalen zet

2 ¹Israel am ekŋengat tuŋguwinan golaŋ zenze an notnaŋ dâsuki sokbemti mamkwabien naman kekok an zikat indanda dâsuki notnaŋ ingat tuŋguwinan sokbewep. Ekŋenaŋ buzakeset Kawawaŋgalen zet katnaŋ zemyuŋgumti ingat nâmkŋepepeŋin walebep. Mti Amobotnaŋin mama kanzizit main yominaŋgapmti gakiye ek ke zemkandatpeme keyegak walelet sakwep sokbemindawe. ²An ekŋen keyaŋ mama mimiŋin okbi okbiŋaŋmak sambe ke mmepe me am notnaŋ ingat tuŋguwinangatnaŋ ekŋenaŋ indikti indamâti keyegak mbep. Ekŋenaŋ kekok mame am nâmkŋepepeŋinpiŋ ekŋenaŋ Kawawaŋgalen zet katnaŋ keyet zemtalati kwelatnaŋ kuwep. ³Mti naman an zikat indanda dâsuki ekŋenaŋ mânep milawatgat ŋoktikŋin temaŋ tapme zet dâsuki mobotnaŋ notnaŋ zemti zet kelakŋaŋ mindamti ingalen kwitnaŋ kwitnaŋ timâbep. Yaŋgut eweŋan penaŋ Kawawaŋaŋ an ekŋen ke zelen tatagat zemkatik bempaye kan keyet ekŋenaŋ yek bemâbep. Kwitnaŋ kwitnaŋ ekŋen indawaleletgat zenzeŋaŋ keyaŋ ewe ekŋen indawalesât damuŋ tazin.

⁴Âpme in ensel ekŋen yom mti Kawawaŋgalen zetnaŋ kulume Kawawaŋaŋ ku aŋgalaŋindeye. Âtâtindeme tambusosogen towebienan ke etaŋ ke matalip. Yaŋ bamgat zemdelat zenze kanen Kawawaŋaŋ ekŋen zem indondoyet zapat zemindeyeyaŋ talip. ⁵Am eweŋan tipman baen mamkwabien ekŋen kekok Kawawaŋ bamkumpeme egaŋ ku indaŋgalange. Egaŋ tuŋgwam temaŋ mme kwati am bekaŋaŋ mimi sambe indawaletmâge. Âpme Noa an mama mimi teŋgat zet zenzeŋaŋ ekmak animbi 7 etaŋ Kawawaŋaŋ indikdamuŋ mimindeme dolakŋaŋ tabien. ⁶Âpme itnaŋan tipman baenen mka temaŋ zut Sodommak Gomola ke kekok bekaŋaŋ palakŋaŋ beme keyepmti tepgat zeme toti

tewañ indazimâge. Keyañ am bekanañ mamip bam ekñen yominangat dopmañ Kawawañ mutumindawe keyet golañin titiñañ. ^{7,8}Kogogak itnañan tipman baenen an ñen Lot ek mamañañ teñ egañ am bekanañ mimi ekñenañ meluwañ bekanañ sakambukñañmak ke mmamkwapme kan katañ ekñengat tunguwinan ke mamti mama mimiñin ke ekti keñañ nukñañ beme ekñengat kemberñ omba penañ mamtan. Kegok mmambe mame Kawawañañ Lot angalañpeye. ⁹Kawawañ Amobotnañañ am teñ mamaip ekñen nukñañ sokbemindame ñep maangalañ indein ma am bekanañ mamip ekñen keyet dopmañin matim metne metne bam zemdelañ zenze kanen omba penañ mutumindame delañ zewe. ¹⁰Am keñinan bekanangat tikñañañ mamisik tazinañ Kawawañangata nâme ku mopme sekñiyek mamsaip. An ekñen keboñ ke dopmañ mgasik penañ mutumindame tiwep.

An zikat indanda dâsuki keyañ kiñgagapiñ zeingat zewi mti ensel Kawawañgalen zet kulume indamâpme tototnañ ekñenmak kogogak maatindondoip. ¹¹Kawawañgalen ensel windenjin temañ penañ tazin ekñen keyañ kogogak Amobotnangata zikatnan ensel bekanañ ekñengat ñenzinziñ omba ku mamip ma ku manzemtalatindeip. ¹²Âpme set kileñ an ekñen keyañ zet yañañ ku nâmâtâlíp keyet ekñenañ zet belakñañ penañ manâip. Keyangut an ekñen keyañ tam boyañ sekñinañangata tikñañ nâmti mamâlíp keyet katañ ekñenañ ilinangata sekñinañgalen kwitnañ kwitnañangata nânâ etañ mamâlíp. Kegok mti amnañ songom zupmañ maindowalelip sakam kegok Kawawañañ indomyaloñme temebeb. ¹³Mti mama mimiñin mgasik keyet dopmañ tiwep. Ekñenañ kasup sutnateman keñinañ bekanañ mimiñet tikñañ manâip ke mamip. Yangut am nâmkijpepeñinmak in tu meujin timbumondekti tatnime set kileñ an ekñen keyañ inmagen koti meu ilinsakwep tatnip. An ekñen ke dâsukiñinben keyepm ingalen tototalin ke mme mgasik tabein. Mti Zisasiyet kwizet buñamañ mamtotpeip. ¹⁴Kan katañ imbimak yom aiikgata imbiñet zikat posi mamip mti bekanañ mimiñelen tikñañin omba penañ wemindain. Am nâmkijpepeñin tuwat tuwat ekñengata kwitnañ kwitnañ keboñgata zet kelakñañ mimindamti indamandame yom ekñenmak tusumti mamip ma mânep milawatgata keñin temañ bemti mamaip. Am mañge ekñen ke teziñ ñandañgata zapata mamaip. ¹⁵Ekñenañ mama mimi esemteñ ke katikpemti Beoyet nemuñañ Balaam egañ mânep tisât nâmti set bekanañ mâti tiye kogok ekñenañ mamip. ¹⁶Ek bekanangata tosañañ titiyet ñoktikñañ temañ tatnânepeme Amobotnañañ zet kululuñangapm ñenzinziñ msaye. Âpme donki zet ñep ku zenzeyelenañgut zet amnañ manzeipnok zemti golañ zenze an dâsuki ke zemkulumpeye. ¹⁷Am ekñen keboñ ke tu zikatnañ bemberañ ma zanza tâgâyañ kumbume mekopme map ku matozin keboñ. Kawawañañ mundumin tambusosogen weyañpeye. Ekñenañ

tambusosok kinjinaŋ keyet keŋan mebegat zapat ombempeye keyet metabep. ¹⁸Ekŋenaŋ mampongaŋin kumti zet manzeip ke penaŋepiŋ. Ekŋenaŋ am notnaŋ imbimak set kileŋ mama ma mama mimi mgasik notnaŋ keyet zet kelakŋaŋ mimindamti keŋin mamwalip. Âpme am ekŋen ke nâmkŋepepen alakŋaŋ kolo kogogapm naman sakwep penaŋ mama mimi bekananengatnaŋ timkwatindenderaŋ keyen ewe gilik zemti melo. ¹⁹An ekŋen keyaŋ am ekŋengat pigok zetik maminindaip, “In zii zet ke ŋep katikpempti lala mebegalen.” Yangut an ilin ke waleletgalen kimbati keŋan tatingut kegok manzeip. An ŋenaŋ bekanangaŋat nâme mopme mambe beme egaŋ keyelen kimbati keŋan toti mambe. ²⁰Nâip, am mama mimi bekanan mâtî mamiwaŋ keŋin gilik zeme Amobotnaŋ ma Aŋgalalaŋ Toŋaŋ Zisas Kilais manâmkŋipeip. Ke naman ekŋenaŋ peme tapme gilik zemti mama mimi bekanan keyet keŋan ewe melumaŋme keyaŋ indatamkitik mti matazin. Kegok mip beme eweŋan mama mimiŋin belaknik bekanan beyeyangut bamgat bekanan penaŋ bewe. ²¹Am ekŋen keboŋ mama mimi teŋgalen set ku nâmmâtîti kegok mbiak ze keyaŋ bekanan omba penaŋ ku benak. Yangut am teŋ mamayelen set ma Kawawaŋgalen zet katnaŋ zemzikat indammimiŋaŋ ke katikpempti ewe mama mimi bekananen mepme bekanan penaŋ mambein. ²²Am ekŋen keboŋ ekŋengat zet pigok zenzeŋaŋ ke katikŋaŋ mambein,
 “Tam ekŋenaŋ meu okme topme ewe keyegak manip.”

(Totatatgalen Set 26:11)

ma “Bo ekŋenaŋ tu zululoyaŋ meti ewe witaliwen manziniŋip.”

Penaŋ sukwep Amobotnangalen zet penaŋepiŋ ku bewe

3 ¹Kilaismagen notnne, neŋ ingat zapat meluwaŋ kumindama sek zut ilak bein. Neŋ zet ŋeŋaŋ kuwann ke ma bam kuyap kapiyet in nâm yungunguŋepiŋ esemteŋ nâmmâtâtâgat nâmti keŋin mbuteyap. ²In eweŋan golaŋ zenze an teŋ mamkwabien ekŋenaŋ zet zewien ma Kawawaŋgalen Zet Zapat Dolakŋaŋ Penaŋ zemkawaŋ bembeyet an indakumtetitiŋaŋ ekŋen Amobotnaŋ ma Aŋgalalaŋ Toŋaŋgalen zet mandiindoip ke ilinsakwep weyaŋ nâmtimti timambep.

³Mti ŋeŋaŋ penaŋ kapigok nâmkatik bewep. Kan delaŋ zenzeyelen bududuk tabeme an notnaŋ mgasik sokbemti zet kukak zet zemti mama mimi bekanangaŋat tikŋaŋin tatindain ke mti mambe. ⁴Mti pigok zewep, “Amobotnaŋ gilik zemti kosât zetik mgeyet manzeiwan penaŋaŋ denen? Ningat yeŋpampme ekŋen pi gakimâpme delaŋ zemâge âpme kwitnaŋ kwitnaŋ sambe kululuŋ msat sokbemti weŋge sepem kegok ke pi ewe wemkwazin.” ⁵Kegok tazewaŋgut eweŋan kululuŋ ma msat sokbewun âpme msat ek tuyengatnan sokbemti witalip temaŋmak msat sepemnok yek weŋge. Kawawaŋaŋ zet etaŋ zeme sokbewun ke nânâyet wisat mamip. ⁶Âpme bam tuyaŋagak gwawam kwati am ma kwitnaŋ kwitnaŋ

sambe asekmaŕe. ⁷Ma zet zeme kwitnaŕ kwitnaŕ sokbeye keyaŕegak kululuŕ msat alak pi talup pi Kawawaŕgalen zemdelan zenze kan keyet tewaŕ idazinziyet damuŕ talup. Âpme am bekanan ekŕenan dopman tiwep kan keyet egelan kegogak asekbalupgapmti keyet damuŕ talup.

⁸Notnne penaŕ, Amobotnanŕat zikanan msasa kwep ma nup kan 1 tausen eget ke idikme kwepnok mambalup. Kogogapm keyet ku kandatindowe. ⁹Amobotnanŕ egaŕ gilik zem kosâgât zetik mgeen olatiyeŕm kan ewe tusume mamezin zemti am notnan ekŕenan nâme kegoknok mambein. Keyaŕgut kegok yek egaŕ am sambe walepme delan zenakgapmti am sambe yominangatnan keŕin gilik zenzeyet kan bugan matusumindain.

Kululuŕ ma msat kapi aseksâpmlup

¹⁰Amobotnanŕ kokotnanŕat kanan am kambu titi memendepmak matimkwalip kegok kobe. Kopme kululuŕ ek kwisak temaŕ kumti asebbe ma kwitnaŕ kwitnaŕ kululuŕen weme maeknup kapi tewaŕ zimâpme delan zemâbe. Msat ma msat palen kwitnaŕ kwitnaŕ tazin kapi zime delan zemâbep. ¹¹Kwitnaŕ kwitnaŕ sambe pi yek bemâbe keyepmti in teŕ mamti kwitnaŕ kwitnaŕ Kawawaŕan nâmtiknaŕ mamin ke mbep. ¹²Mama mimi kegok mti Kawawaŕ kokotnanŕat damuŕ mbep. Mti in mulup windeŕanbenŕ mti egalen kokot kanan ke mandame sokŕanik kobe. Kan keyet kululuŕ tep temaŕan zime yek bewe ma kwitnaŕ kwitnaŕ kululuŕen weme maeknup pi kegogak tezingat kipmaŕan kâme zalim tobe. ¹³Âpme nin Kawawaŕan kululuŕ alaknaŕ ma msat alaknaŕ mme sokbeme ndandayet zetik mimndandanaŕ keyet damuŕ tapmanup. Mka msat alaknaŕ ke am mama mimi teŕ mti mamaip ekŕenan toŕan bembeyet zeye. ¹⁴Kogogapm notnne penaŕ in kwitnaŕ kwitnaŕ keboŕ sokbemindandayet damuŕ mamti Kawawaŕmak keŕ sewaŕnaŕ palen mambep ma egat zikanan kwetetepmaŕ ma mubulupiŕ tabep.

¹⁵Âpme Amobotnanŕan kan ewe tusume teepmanŕ mepme ekti zewep. Nin keŕ gilik zenzeyet egaŕ damuŕ tazin kegok nâmbep. Ningat notn Pâlan zet keyegak Kawawaŕan ŕoktiknanen beme ingat kegok kumindaye. ¹⁶Egaŕ zapat meluwaŕ sambe kuyeen nâlen zet kumindayap galak zeme kuye. Kegogapmti am nânâninpiŕ ma am nâmkipepeŕin tuwat tuwat ekŕenan zet keyet yaŕan nuknaŕ penaŕ tazin ke ŕep ku nâmâtâtâgalen. Ekŕenan zet keboŕ keyet yaŕan manzemyuŕguip ma Kawawaŕgalen zet katnaŕ sambe kegogak manzemyuŕgupgapmtiŕgut dopman walelet aikmâbep.

¹⁷Notnne penaŕ, golaŕ zet eweŕan diindondoŕan keyepmti am belaknaŕ penaŕ mamaip ekŕengalen zemyuŕguŕguyaŕ keŕin mme yuŕgume suknaŕ bewepmagengat keŕin weyaŕti damuŕ mbep. ¹⁸Âpme Amobotnanŕ ma An Anŕgalalaŕ Toŕ Zisas Kilais egalen keŕ taolelan indamukulem mme egat yaŕan nânâyet nânânin masemem mopmambe. Mme nin Ek kwesiŕ kwesiŕ sesewatpemt i mamambanup! Ke penaŕ.